

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

LAWATAN KERJA KETUA SETIAUSAHA KPDNHEP KE KOMLEKS IMIGRESEN, KASTAM DAN KUARANTIN (ICQ) PADANG BESAR, PERLIS

KANGAR, 15 Mei 2022 – YBhg. Tuan Azman bin Mohd Yusof, Ketua Setiausaha Kementerian Perdagangan Dalam Negeri dan Hal Ehwal Pengguna (KPDNHEP) telah mengadakan lawatan kerja ke Kompleks Imigresen, Kastam dan Kuarantin (ICQ) Padang Besar, Perlis. Turut hadir dalam lawatan kerja ini adalah YBrs. Tuan Shamsul Nizam bin Khalil, Timbalan Pengarah Penguat Kuasa (Operasi) KPDNHEP serta YBrs. Puan Norazah binti Jaapar, Pengarah KPDNHEP Perlis.

2. Tujuan lawatan kerja ini diadakan adalah bagi melihat sendiri situasi semasa di pintu sempadan Negara khususnya di sempadan Padang Besar ini serta mengeratkan kerjasama pihak KPDNHEP bersama agensi-agensi penguatkuasaan yang lain di ICQ Padang Besar khususnya pihak Jabatan Imigresen Malaysia (JIM) dan Pasukan Gerakan Am (PGA), Polis Diraja Malaysia (PDRM) Negeri Perlis terutamanya dari aspek perdagangan berikutan pembukaan semula sempadan Negara bermula 1 April 2022.

3. Dalam lawatan kerja ini juga, antara isu yang dibincangkan adalah berkaitan isu aktiviti penyelewengan/penyeludupan barang kawalan bersubsidi melalui pintu sempadan Malaysia – Thailand menerusi sempadan Padang Besar khususnya melibatkan barangan kawalan dan bersubsidi

seperti Gas Petroleum Cecair (LPG), Minyak Masak, bahan api Petrol dan Diesel, Gula dan Tepung Gandum.

4. Isu penyelewengan barang kawalan bersubsidi di sempadan antarabangsa Malaysia yang terdiri daripada Negara Thailand, Indonesia, Brunei dan Singapura merupakan salah satu perkara utama yang menjadi perhatian oleh pihak Kementerian.

5. Berdasarkan statistik penguatkuasaan oleh Bahagian Penguat Kuasa KPDNHEP pada tahun lalu bermula 1 Januari sehingga 31 Disember 2021, sebanyak 714 kes telah dihasilkan melibatkan barang kawalan di bawah Akta Kawalan Bekalan 1961 melibatkan nilai rampasan berjumlah RM 6.60 juta. Daripada jumlah itu, sebanyak 250 kes telah dihasilkan hasil kerjasama Kementerian dengan agensi penguatkuasaan di sempadan, melibatkan aktiviti penyeludupan barang kawalan dan bersubsidi di pintu-pintu sempadan Negara di bawah Akta yang sama di seluruh Negara melibatkan nilai rampasan keseluruhan berjumlah RM 5.18 juta.

6. Manakala bagi tahun 2022 bermula 1 Januari sehingga April 2022, sebanyak 94 kes penyeludupan barang kawalan dan bersubsidi di pintu-pintu sempadan Negara yang dihasilkan oleh pihak KPDNHEP bersama agensi penguatkuasaan lain di seluruh Negara melibatkan nilai rampasan berjumlah RM 7.88 juta di bawah Akta Kawalan Bekalan 1961.

7. KPDNHEP memandang serius isu ketirisan barang kawalan dan bersubsidi terutamanya yang berlaku di pintu-pintu sempadan Negara

kerana ianya boleh memberikan impak negatif dan kerugian yang besar kepada Negara. Selain itu, barang kawalan dan bersubsidi ini sepatutnya dinikmati oleh **Keluarga Malaysia** tetapi telah diseleweng/diseludup oleh pihak yang tidak bertanggungjawab demi mengaut keuntungan lumayan dengan melakukan aktiviti haram ini.

8. Susulan pembukaan sempadan Negara yang diumumkan Kerajaan mulai 1 April 2022 lalu, KPDNHEP telah mempertingkatkan tindakan penguatkuasaan di pintu-pintu masuk sempadan di seluruh Negara dengan menjalankan kerjasama erat bersama agensi-agensi penguatkuasaan berkaitan seperti Polis Diraja Malaysia (PDRM), Angkatan Tentera Malaysia (ATM), Jabatan Kastam Diraja Malaysia (JKDM), Agensi Penguatkuasaan Maritim Malaysia (APMM) dan Jabatan Imigresen Malaysia (JIM). Antara bentuk kerjasama tersebut adalah dari segi perkongsian maklumat serta kepakaran dalam memastikan isu-isu berkaitan ketirisan barang kawalan dan bersubsidi dapat dibanteras bersama.

9. KPDNHEP ingin memberikan peringatan kepada para peniaga agar lebih bertanggungjawab apabila mengurus niaga dengan barangan kawalan dan bersubsidi ini serta amaran keras kepada mana-mana individu mahupun syarikat supaya tidak melanggar undang-undang, terutama membabitkan penjualan dan pengedaran barang kawalan ini bagi mengelakkan daripada dikenakan hukuman berat.

10. Tindakan tegas di bawah Akta Kawalan Bekalan (AKB) 1961 akan dikenakan ke atas mana-mana orang yang melakukan kesalahan dan jika

disabitkan boleh didenda tidak lebih RM1,000,000.00 (Ringgit Malaysia Satu Juta) manakala bagi kesalahan berikutnya tidak melebihi RM3,000,000.00 (Ringgit Malaysia Tiga Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM2,000,000.00 (Ringgit Malaysia Dua Juta) manakala bagi kesalahan berikutnya tidak melebihi RM5,000,000.00 (Ringgit Malaysia Lima Juta).

11. Bagi memberikan impak yang lebih berkesan, tindakan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Haram 2001 (AMLATFPUAA 2001) akan dilakukan. Jika mana-mana orang disabitkan dengan kesalahan di bawah kesalahan seksyen 4 [Akta 613] AMLATFPUAA 2001 boleh dipenjarakan selama tempoh tidak melebihi lima belas tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau lima juta ringgit, yang mana yang lebih tinggi. Bagi harta-harta yang dapat dibuktikan terlibat dengan pengubahan wang haram juga akan dilucuthak dan dijadikan hasil kepada kerajaan Malaysia.

12. Masyarakat digalakkan untuk bersama-sama membantu Kerajaan dengan menjadi mata dan telinga kepada pihak berkuasa untuk menyalurkan maklumat dan aduan berhubung isu penyelewengan/penyeludupan barangan kawalan dan bersubsidi.

13. Orang ramai yang mempunyai sebarang maklumat berkaitan aktiviti penyelewengan/penyeludupan barang kawalan dan bersubsidi ini boleh melaporkan kepada pihak KPDNHEP melalui saluran aduan berikut:

- i. WhatsApp 019-279 4317 / 019-848 8000
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

Azman bin Mohd Yusof

Ketua Setiausaha

Kementerian Perdagangan Dalam Negeri
dan Hal Ehwal Pengguna

PUTRAJAYA

15 Mei 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

